

Peroveta Ezekiel ana buka

Pariverena

Ezekiel mai Jew au Babilon i vipanipani awari i babani. Tauna mara nonoa vivirarautua vinu-alaulaunai ma awanainei ana babani i tereterei.

Tauna rava ai riwa vouna i verei da ina vipaipai ma ai bada ina terepa-melei.

God mai Israel dobu au gia dewadewana anata-pui ina neiana-meleiana da ai au dobu oina ina terei.

2

God Ezekiel i vinei ana peroveta

¹ Bada ana boruma a inanai ma au doa a peu. Ma a nonori pona i riweu, i pa, “Rava ota natuna, ma vomairi ma awarim ana babani.”

² I bababani ma God aruana au orau i rui ma i voepaiu ma a nonori awariu i bababani.

³ I riwa, “Rava ota natuna, a pariparitananem dam paripariviravirai mai Israel awarii. Amamai maiteni ega ita voteleteleu ma awariu i pariviravira da marina.

⁴ Rava paripariviravirai ma orai badobadoi ma ega ita vivivireu. A pariparitananem da ma riwei, ‘Wei Bada riwana.’

⁵ Tau i paripariviravirai ma ina rautaniḡanem bo ega lamna avena, wate ina aramanei da peroveta i getai awarii.”

17

God Israel ina ravivouni

²² Bada God wenanare i riwa, “Tau ai cedar manamanaina nuanuana ana vogai da ana paewi. Raḡana au tepadewadewana nabina ana gai da ola manamanaina au tepana ana paewi.

²³ Israel ola au tepai ana paewi, ina raḡai ma ina raunumo, ai gulauna. Kiu tapuna ma tapuna au raḡai ina raunoḡi ma au ḡoui ina viḡou.

²⁴ Ai anatapui nai au dobuna ina aramanei da tau BADA, ai manamanaii ana taragai ma ai tupotupooi ana voepai. Ma ai majimajiḡana ana vipoini ma ai poina ina raurugu ma ina rata, Tau BADA a babani, ma aiwai a riwei nanare ana kauei.”

33

God Ezekiel i vinei da tauvineneḡana.

BADA i riwa:

⁷ “Rava ota natuna, Tau a vinem tauvineneḡana dam Israel aubai; riwa a vereverem ma nonori ma babani bagibaginei ma riwei.

⁸ Maranai ḡo’apoapoe ravana a ririwei, ‘Tam, ḡo’apoapoe ravana, amapo ma i ’raḡe.’ Ma ravana eḡa uta pariveri da ana ḡo’apoapoe ita voterei, ma ina iraḡe. Marina ana iraḡe au uram a tereterei.

⁹ Wate mepa da ḡo’apoapoe ravana u riwei da ana lawana ita virai ma eḡa ana lawana ita virai, ana ḡoa apoe ina iraḡelei, ma tam am lawana ina mae.”

34

BADA tauvipaipai aiaina

11 Bada God wenanare e ririwa, “Tau ainelau au sipu ana baiei ma ana ġamoi.

12 Sipu taupainina, ana sipu kwakokwakoi e baibaiei da e nenemeleiai. Nanare tau, au sipu e kwakokwako-nae. Ana nelaġai ma ana neiana-meleiai, maranaina dobu i waguwarei ma i gimtonei.*

15 —Tau ainelau au sipu ana ġamoi ma ana terei da ina matave kaua, Tau BADA God a babani.

16 Tau kwakokwakoi ma nelabalababai ana baiei, ma ana neiana-meleiai. Ma keroi ana bunamai ma ġokokokarai ana vovaiwewapani. Wate dododoi ma virewapanai ana pupuni. Jijimaninei au sipu ana ġamoi.

17 —Taumi au sipu Tau BADA God a ririwana-kauemi da taumi tagotagogi ava ana rauetaremi. Aiaii ma apoapoei ana vilamonei, sipu ma gote ana vilamonei.”

36

BADA ana rava ina ravivouni

16 BADA i riweu, i pa,

17 “Rava ota natuna, maranai Israel ai au dobu i mamae, taui ai kaua apoapoei ai dobu i vimirai. Tau au matau lamna i vimira-melei me wavine ana nawaravi e vaivaia.

* **34:12:** Wei lamna awanaina maranai mai Babilon Israel ina pupuna-naiei au 587 B.C.

18 Marina, au meji ana iwaḡa-tawanei awarii aubaina tauī tara i vitoini au dobu, ma nanare kokoitauei dobu i viapoapoeni.

19 A vidabararai ma a vilamolamonei au dobuḡela, ai ḡo'apoapoei ma ai kauga awariei a kovoḡi.

20 Wate metauna au dobuna i rui tauī wawau vivivireina i vijiboḡi, aubaina nai dobuna ravai e ririwa, 'Wei lamna BADA ana rava wate ana dobu i opu-tawanei.'

21 A ḡoei da au rava au wava vivivireina ita vimaḡaeḡaeni, wate noi rava mai Israel dobu anatapuī i naeni ma i vitepaubaubaiu.

22 —Lamna aubaina, marina dam Israel ma parivereī, Bada God wei i riwei, 'Tau a neineiana-meleiaimi, eḡa tam am kauga aiaina aubaina. Tau a kaukauei wawau vivivireina aubaina, taumi wawau o viapoapoenanaieī jentail ai au dobu.

23 Ana viatataieī da wawau, ḡetelarana ma vivivireina. Wawau taumi dobu au anatapuna o vitepaubaubai. Taumieī dobu ana viatataieī da tau vivivireu

24 aubaina dobudobuai ana taravainimi ma ana neiana-meleiaimi ami au dobu.'

25 —Waireī ana vitoaimi da ona aii, ami mira ma kokoitau viborumai mirana ina oḡa-tawanei.

26 Ma nuanuami vouna, ma aruami vouna ana veremi. Nuanuami badobadoi ana votawanei ma aiaina ana terei.

27 Ma Aruau au oram ana terei da au tarawatu ma au viararamana ona votaḡotaḡoi."

37

BADA gelama ina ravivouni

¹ BADA i raunimavoaiu ma aruanei i naieu da gwagwa gaeḡaena au pouna i tereu, rava gelamii gwagwanana i oai.

² Gwagwanana a naeni ma a inanai da gelama i maḡa guratana ma i poi.

³ I paridadaneu, “Rava ota natuna, amapo wei gelamii ina virava me bo eḡa?” A paribelei, “Oo! Bada God, tam ainelam u aramanei.”

⁴ Ma i riweu, “Riwauei gelama ma riwei, ‘Gelama poii, BADA riwana ona nonori.’”

⁵ Bada God wenanare gelama i riwei, “Lavutu au orami ana terei ma ona lawana me!

⁶ Vioa ma warowaro ana veremi, ma opi da gelama ina purui. Ma lavutu ana veremi da ma lawana. Kampa ma aramanei da Tau BADA.”

⁷ I ririweu nanare a babani, a vikarei da a bababani ma dobuna ura ketarana i nae da dobuna i oai, gelama anatapui i vitagogiei.

⁸ A inainana ma warowaro ma vioa gelama au tepana i ampasi ma au tepai opi i tupua da i purui, wate awari eḡa lavutu.

⁹ Ma i riweu i pa, “Rava ota natuna, Bada God riwanei ive ma riwei, ‘Bada God e ririwa, ive meiei da meiei e uveuvena, au orami lavutu ina opui ma taubeu patarai e matamatave ona uveni da ina lawana me.’”

¹⁰ Ma i ririweu nanare a babani, ma lavutu ravai tupuai i ruini. Anatapui i lawana ma i mairi sorodia boruna gaeḡaena.

¹¹ I riwa me, “Rava ota natuna, mai Israel lamna me wei gelamii. Tau i ririwa i pa, ‘Tauta gelama poi ava ma ata tumaḡana i kwa, ata dam i kwa.’”

¹² Lamna aubaina ma riwana-meiei, Bada God wenanare e ririwa, ‘Ona inana! Ami kokoaga

ana votawanei ma ana voepaemi ma ana neiana-meleiaimi au Israel.’

¹³ Au rava! Maranai wei i tupua, ona aramanei da Tau BADA.

¹⁴ Ma Aruau au orami ana terei ma ona lawana ma ana neiana-meleiaimi ami au dobu oina. Maranaina, ona aramanei da Tau BADA. Ee! A ririweia; ana kauei.”

Wedau Mark
The Gospel of Mark in the Wedau Language of Papua
New Guinea
Buk Mak long tokples Wedau long Niugini

copyright © 2010 Wycliffe Bible Translators, Inc.

Language: Wedau

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-08-30

PDF generated using Haiola and XeLaTeX on 18 Apr 2025 from source files dated 31 Aug 2023

aa19f3e3-98fb-51fa-9c53-3906edc75f11